



Saslušanjem posljednjih svjedoka Vijeća Suda BiH, okončan je dokazni postupak na suđenju Srpku Pustivuku, optuženom za zločin protiv civilnog stanovništva počinjen u maju 1992. godine na području općine Ilijaš. Sudsko vijeće pozvalo je Refika Šehića, te zaštićenu svjedokinju S3 kako bi u sudnici prepoznali Zorana Crnogorca, svjedoka kojeg je Vijeće saslušalo na ročištu održanom [8. novembra ove godine](#), kada je izjavio da nikada nije ratovao na "biočkom ratištu".

Šehić je rekao da je 29. maja 1992. vidio Crnogorca, zajedno s optuženim Pustivukom, u grupi što se kretala u pravcu kuće bošnjačke porodice u Gornjoj Bioči (općina Ilijaš) u kojoj su, prema optužnici, ubijene dvije, a ranjene tri osobe.

"Vidio sam ga, i Zoran je bio s njima. Gledao sam ih s prozora kuće. Od mene su bili udaljeni oko deset metara. Ubrzo nakon što su prošli, čula se pucnjava", kazao je svjedok, potvrdivši da se ista grupa vraćala natrag noseći dvoje ranjene djece. Šehić je dodao i da tog dana nije vidio da drugi vojnici prolaze kroz selo.

Crnogorac na ovom ročištu nije davao iskaz, već je samo ušao u sudnicu kako bi ga svjedok Šehić prepoznao. Svjedoci Šehić i S3 su već dali iskaz u korist Tužilaštva BiH na suđenju Pustivuku.

Srpko Pustivuk je optužen da je, kao pripadnik Stanice javne bezbjednosti (SJB) Ilijaš, 29. maja 1992. godine, s drugim pripadnicima vojske i policije Srpske Republike BiH, učestvovao u napadu na civile u selu Gornja Bioča. U optužnici se navodi da su tom prilikom ubijena dva, a teško ranjena tri civila, od kojih je dvoje bilo maloljetno. Tužilaštvo BiH tereti Pustivuka da je tokom maja i juna 1992. učestvovao i u nezakonitom zatvaranju civila Bošnjaka, koji su potom pritvarani u logore i druge zatočeničke centre.

Iskaz svjedokinje S3 dat je bez prisustva javnosti.

Sudsko vijeće je među dokaze uložilo tri dokumenta, između ostalog i dopis Centra javne bezbjednosti (CJB) Istočno Sarajevo, u kojem se navodi da u arhivama nisu pronađene službene zabilješke Srpkua Pustivuka iz SJB-a Ilijaš.

Iznošenje završnih riječi Državnog tužilaštva zakazano je za 29. novembar ove godine.

[Preuzeto sa www.ilijas.ba](http://www.ilijas.ba)